

L'aut' semaine quand j'nos rencontrînmes pouor lé café à St Ouën, tchitch'uns d' nous 'taient à distchuter lé mangi et les r'pas tchi nos pâssaient lé pus près du tchoeu.

En m'en r'allant siez nous sus ma bike, je c'menchi à penser comment qu' lé maîntchein a changi avau l's années.

Quand j'tais mousse j'mangêmes des patates et lédgeunmes crus sus la fèrme . J'gardêmes des couochons et des poules. Quand les poules c'menchaient à vieilliyi, nou-s-'avait eune poule bouoillie. V'là tchi donnait un bouan bouoillon pouor d'la soupe dé lédgeunmes, et la poule même avait bouan goût pour bein qu'ouille avait 'té tchuite pour des heuthes.

l' faut sé rappeler qué j'sis à pâler dé la vie eune dgizaine d'années auprès la dgèrre. l' fallait tréjous sauver tout. Si nou-s-'avait des patates bouoillies au dînnner, et tch'i' y' en avait d' trop, i' taient fricachies pour lé théé, auve ofûche des pais d'mai et des cârottes.

Lé boulandgi Rive délivrait lé pain siez nous trais fais la s'maine, et eune fais la s'maine, siez Downer au haut du Mathais, nou-s-'ordonnait dé tchi comme du chucre, du théé, des galettes, du savon pour faithe lé lavage etc.

Pouor un temps, ma grand'méthe faisait lé beurre, mais quand ou donnit à haut, lé beurre arrivait avec lé restant dé l'ordre.

Avec ma grand'méthe i' fallait tréjous qué ch' fûsse du beurre Jèrriais, et dans des temps dans l'Hivé, la "dairy" couothait à court dé lait, et i' n'faisaient pas d'beurre. Nou 'tait oblyigis d'acater du beurre d'ailleurs. Ma grand'méthe mangeait san pain sec. Ch'tait pas lyi tchi s'en allait mangi chu paûtchîn-là!!

Ch'la m'ramémouaithe d'eune occâsion quand ch'tait à l'êcole, et j'allêmes à Phillips Street, éyou qu'est l' Arts Centre, pouor apprendre à couôtre et coutchi.

Eune semaine, la r'chette 'tait pouor faithe d'la soupe de lédgeunmes. Mangnifique!!

Mais quand ma Grand'méthe ouit pâler tch'i' y'avait du fronmage dedans ou r'fusit d'la mangi.....tchi paûtchîn!!

Nou-s'-allait à la pêche à basse eau pour des vlicots. Un vaïthin allait ès pihangnes, et un aut' avait un p'tit baté, et il arrivait avec du maqu'thé...et tchiquefais d' l' andgulle. Lé vaïthin n'avait p'têt' pon d' pommièrs, d'même pus tard dans l'année, nou li portait eune pann'lée d'pommes. Ch'tait là, la bieauté d' vivre dans la campagne, et ch'là s'arrive acouo au jour d'aniet.

Ma M'mée n'tait pas en peine dé coutchi du tout, mais dans des temps, ou nos faïthait des p'tites gâches avec d'la corînthe ou bein eune Victoria sandwich.

Un problième tchi y'avait siez nous 'tait lé fou. L'Aga couothait sus du tchèrbon et nou n' pouvait pas régler la tempéthatuthe, d'même i' tait souvent trop haut et tout brûlait mais n'tait pas tchui dans l'mitan ou bein trop bas, et les gâches prannaient trop longtemps à tchuithe et 'taient duthes coumme d'la galette.

Eune bouanne chose au jour d'aniet est qué nou peut s'fier sus les tempéthatuthes des fours. Nou pousse sus deux'-trais boutons, et lé fou c'menche à cauffer à la chaleur r'commandée.

Achteu j'pouvons goûter du mangi dé partout l'monde si j'voulons, mais en même temps lé monde lus pliaignent pus qu'janmais. l' y' a tant d'choses tch'i' n'aiment pon. J'pense souvent à mes pathents et chein tch'i' m'dithaient quand j'n'aimais pas tchique chose.....si t'avais 'té 'chîn duthant la dgèrre, tu l'éthais mangi.

Eune aut' chose que nou n'connaissait pon 'tait 'TAKEAWAY'. Man doue d'la vie!

Si ma grand'méthe 'tait 'chîn, i'n'y'a pon d'doute qu'ou nos dithait: n'en v'là-ti du paûtchîn'!!